



CUIDA BO AUTO CU PIESANAN DI NAPA AUTO-PARTS OBTENIBLE NA NOS SUCURSALNAN NA:

Cura Cabay 145
Tel: 584-5046

Sabana Blanco 70
Tel: 583-4363

Shaba 1
Tel: 587-0621



Jessey Ras, hefe Bureau Formacion Social

“Di dos grupo di hoben cu entusiasmo y motivacion a cuminsa na nan trayecto”

JESSEY Ras a wordo nombra Hefe di e Bureau Formacion Social y Omar Harms ta e persona cu ta yuda den coordina e

trabou. E ley Formacion Social a keda unanimamente aproba den Parlamento di Aruba na luna di october 2011. Mesora

su tras a cuminsa na recluta e prome grupo di hoben y ya pa luna di november un grupo di 20 hoben a cuminsa na e prome fase di Formacion Social. Na Kazerne nan a wordo guia den nan training pa Capitan Werleman y su team cu ta consisti di militarnan di Arumil. Dos siman pasa un grupo di 12 hoben a pasa nan prome fase cu exito y a ricibi nan certificado y nan baret den presencia di mayor, famia y otro invitadonan. Tabata un dia di hubilo, di alegria y di hopi emocion. Di e grupo aki seis a bay Valero y seis APA pa un stage di 4 luna. Nan ultimo 4 luna nan ta pas'e na Enseñansa pa Empleo unda nan ta siña un ofishi pa asina por drenta mercado laboral.

Siman pasa dialuna e di dos grupo consistiendo e biaha aki di 24 hoben den oranan tempran di mainta a acudi na MariniersKazerne na Savaneta pa asumi nan responsabilidad pa ta parti di e proyecto Formacion Social. Un total di 41 hoben a inscribi di cua 4 a cay

afo den un prome screening. E comision di seleccion tambe a haci un screening y un total di 28 hoben a bin na remarke pa por participa na e prome fase di Formacion Social. E comision aki ta wak diferente aspecto, por ehempel si e hoben tin un diploma of no ta cumpli cu e edad cu mester tin of tin un problema di salud. Di e 28 hobennan aki 24 a keda selecta y 4 a keda como reserva. Jessey Ras a splica cu e siguiente grupo di hoben ta cuminsa na januari 2013. Esaki debi na e echo cu Arumil mes tambe ta cuminsa na recluta su grupo di militarnan cu ta start cu nan training na luna di augustus di e aña aki. Jessey Ras kende a siña conoce e 24 hobennan cu a cuminsa cu nan trayecto durante e periodo cu nan tabata wordo gescreend hopi di cerca. Un par di dia despues cu nan a drenta Kazerne el a haci nan un bishita. Jessey Ras: “Mi no a reconoce nan. Nan cara tabata pinta cu colornan di camuflahe y nan cabey a wordo corta. Un cambio

completo. Mi mester a sinta wak bon pa sa ken ta ken”. E hobennan a cuminsa e trayecto cu hopi motivacion y entusiasmo. Capitan Werleman un bes mas ta cla pa e reto.

E ta pidi cooperacion y sosten di famia y mayornan pa hunto nan yega na e meta comun. Ras a bisa cu e grupo aki no ta bay core stage di 4 luna manera e prome grupo, pero ta bay di biaha Enseñansa pa Empleo pa cuminsa cu nan curso y ta core un luna di stage. E ley Formacion Social ta un proyecto piloto cu ta dura tres aña. Despues di esaki e ta wordo evalua pa mira si mester sigui cu ne. Manera cosnan ta muestra te awor, el a duna su frutonan caba mirando e reaccionnan positivo y e impacto social cu e tin riba comunidad. Dentro di poco Jessey Ras ta muda pa su oficina na MariniersKazerne. E Proyecto Formacion Social ta un cooperacion entre Gabinete Mike Eman, Ministerio di Defensa y Ministerio di Asuntonan Interior di Hulanda.

